



戎政典第一百七十卷

兵略部彙考六十八

宋十

高宗紹興元年五月張俊岳飛同討李成敗之金人犯和尚原吳玠吳玠大破之按宋史高宗本紀紹興元年春正月馬進陷江州守臣姚舜明棄城走端明殿學士王易簡等二百人皆遇害己酉岳飛引兵之洪州二月甲申詔王玠張俊犄角討捕馬進等賊己丑命孔彥舟呂頤浩張俊會兵討李成三月戊戌呂頤浩遣崔增王玠合兵擊李成于湖口大敗之丙午張俊楊沂中岳飛渡江擊馬進敗之孔彥舟焚掠潭州趨衡州己酉李成犯饒州庚戌張俊楊沂中復擊馬進于筠河敗之復筠州進奔江州甲子始下詔罪李成募人禽斬赦脅從者張俊追馬進至江州進戰敗遁去乙丑進復江州楊沂中趙密引兵追擊進又大敗之成奔蘄州五月丁酉始奪李成官癸卯金人犯和尚原吳玠擊敗之是月張俊及李成戰于黃梅縣殺馬進成敗遁歸劉豫六月甲午張俊承制以吳玠爲陝西諸路都統制冬十月癸酉兀朮攻和尚原吳玠及弟玠力戰大敗之兀朮僅以身免按岳飛傳

紹興元年張俊請飛同討李成時成將馬進犯洪州連營西山飛曰賊貪而不慮後若以騎兵自上流絕生米渡出其不意破之必矣飛請自爲先鋒俊大喜飛重鎧躍馬潛出賊右突其陣所部從之進大敗走筠州飛抵城東賊出城布陣十五里飛設伏以紅羅爲幟上刺岳字選騎二百隨幟而前賊易其少薄之伏發賊敗走飛使人呼曰不從賊者坐吾不汝殺坐而降者八萬餘人進以餘卒奔成于南康飛夜引兵至朱家山又斬其將趙萬成聞進敗自引兵十餘萬來飛與遇於樓子莊大破成軍追斬進成走蘄州降僞齊 按楊存中傳存中爲御前中軍統制紹興元年從張俊討李成諸將議多欲分道進存中曰賊勢如此兵分則力弱又諸將位均勢敵非招討督之必不相爲用俊然之整軍至豫章存中率兵數千首破賊于玉隆觀追至筠州賊驍將以衆十萬來援夾河而營存中謂俊曰彼衆我寡擊之當用奇願以騎見屬公以步兵居前俊從之存中夜銜枚渡筠河出西山馳下擊賊俊以步兵夾攻俘八千人諸將夜見存中曰戰未休降卒多忽有變奈何非盡殲之不可存中曰殺降吾不忍諸將轉告俊竟夜坑之乘勝追至九江成遂遁去遷宣州觀察使 按張俊傳俊改江南招討使紹興元年帝至會稽時金人殘亂之餘孔彥舟據武陵張用據襄漢李成尤悍彊據

江淮湖湘十餘州連兵數萬有席卷東南意多造符讖蠱惑中外圍江州久未解時方患之范宗尹請遣將致討俊慨然請行遂改江淮路招討使成黨馬進在筠州豫章介江筠之間俊聞命就道急趨豫章且曰我已得洪州破賊決矣乃斂兵若無人者金鼓不動令將士登城者斬居月餘進以大書牒來索戰俊以細書狀報之賊以俊爲怯俊諜知賊怠乃議戰岳飛爲先鋒楊沂中由上流徑絕生米渡出賊不意追奔七十里至筠州賊背筠河而陣俊用楊沂中計親以步兵當其前精騎數千授沂中及陳思恭俾從山後夾擊以午爲期俊與賊鏖戰至午精騎自山馳下賊駭亂退走大敗旣復筠州臨江軍捷奏帝賜御筆謂宜乘賊勢已衰當官軍已振驅除勦戮速收全功俊未拜親詔已追至北奉新樓子莊賊黨商元據草山挾險設伏俊遣步兵從間道直趨山椒殺伏奪險乘勝追至江州成勢迫絕江而遁號俊爲張鐵山復江州已而興國軍等處羣盜聞俊兵至皆遁去俊引兵渡江至黃梅縣親與成戰成繼奉新失險之敗據石矢坡憑山以木石投人俊先遣游卒進退若爭險狀以誑賊俊親冒矢石帥衆攻險賊衆數萬俱潰馬進爲追兵所殺成北走降劉豫諸郡悉平拜太尉按吳玠傳紹興元年金將沒立自鳳翔別將烏魯折合自階成出散關約日會和尚原烏魯折

合先期至陣北山索戰玠命諸將堅陣待之更戰迭休山谷路狹多石馬不能行金人舍馬步戰大敗移砦黃牛會大風雨雹遂遁去沒立方攻箭箐關玠復遣將擊退之兩軍終不得合始金人之入也玠與璘以散卒數千駐原上朝問隔絕人無固志有謀劫玠兄弟北去者玠知之召諸將歃血盟勉以忠義將士皆感泣願爲用張浚錄其功承制拜明州觀察使居母喪起復兼陝西諸路都統制金人自起海角狃常勝及與玠戰輒北憤甚謀必取玠婁宿死兀朮會諸道兵十餘萬造浮梁跨渭自寶鷄結連珠營壘石爲城夾澗與官軍拒十月攻和尚原玠命諸將選勁弓強弩分番迭射號駐隊矢連發不絕繁如雨注敵稍却則以奇兵旁擊絕其糧道度其困且走設伏於神垓以待金兵至伏發衆大亂縱兵夜擊大敗之兀朮中流矢僅以身免張浚承制以玠爲鎮西軍節度使璘爲涇原路馬步軍副總管按吳璘傳紹興元年箭箐關之戰斷沒立與烏魯折合兵使不得合金人遁璘功居多超遷統制和尚原軍馬於是玠駐師河池璘專守原及兀朮大入玠兄弟以死守之敵陣分合三十餘璘隨機而應至神垓伏發金兵大敗兀朮中流矢遁張浚承制以璘爲涇原路馬步軍副都總管升康州團練使

紹興二年正月韓世忠破范汝爲於建州二月命岳飛等討曹成諸盜七月世忠討破劉忠於岳州按宋史高宗本紀紹興二年春正月丙申韓世忠圍建州辛丑世忠拔建州范汝爲自焚死斬其二弟餘黨悉平癸丑曹成犯郴州永興縣二月命岳飛率馬友李宏韓京吳錫等共討曹成諸盜三月庚申曹成寇賀州清水砦守臣劉全棄城去夏四月甲子曹成陷賀州丙申兵飛擊破曹成於賀州丙午岳飛敗曹成於桂嶺縣成走連州遣統制張憲追擊破之又走郴州入邵州五月韓世忠至洪州遣董敗招曹成成聽命赴行在秋七月庚辰韓世忠討劉忠駐兵於岳州之長樂渡大破之忠走淮西九月世忠遣統制解元襲擊劉忠於蘄陽大破之忠奔劉豫按韓世忠傳建安范汝爲反辛

企宗等討捕未克賊勢愈熾以世忠爲福建江西荆湖宣撫副使世忠曰建居閩嶺上流賊沿流而下七郡皆血肉矣亟領步卒三萬水陸並進次劍潭賊焚橋世忠策馬先渡師遂濟賊盡塞要路拒王師世忠命諸軍偃旗仆鼓徑抵鳳凰山俯瞰城邑設雲梯火樓連日夜併攻賊震怖巨測五日城破汝爲竄身自焚斬其弟岳吉以徇禽其謀主謝嚮施逵及裨將陸必疆等五百餘人世忠初欲盡誅建民李綱自福州馳見世忠曰建民多無辜世忠令軍士馳城上毋下聽民自相別給農牛穀商

賈弛征禁脅從者汰遣獨取附賊者誅之民感更生家爲立祠捷聞帝曰雖古名將何以加賜黃金器皿世忠因奏江西湖南寇賊尙多乞乘勝討平廣西賊曹成擁餘衆在郴邵世忠旣平閩寇旋師永嘉若將就休息者忽由處信徑至豫章連營江濱數十里羣賊不虞其至大驚世忠遣人招之成以其衆降得戰士八萬遣詣行在遂移師長沙時劉忠有衆數萬據白面山營柵相望世忠始至欲急擊宣撫使孟庾不可世忠曰兵家利害策之審矣非參政所知請期半月效捷遂與賊對壘奕棋張飲堅壁不動衆莫測一夕與蘇格聯騎穿賊營候者呵問世忠先得賊軍號隨聲應之周覽以出喜曰此天錫也夜伏精兵二千於白面山與諸將拔營而進賊兵方迎戰所遣兵已馳入中軍奪望樓植旗蓋傳呼如雷賊回顧驚潰磨將士夾擊大破之斬忠首湖南遂平 按岳飛傳紹興二年賊曹成擁衆十餘萬由江西歷湖湘據道賀二州命飛權知潭州兼權荆湖東路安撫都總管付金字牌黃旗招成成聞飛將至驚曰兵家軍來矣卽分道而遁飛至茶陵奉詔招之成不從飛奏比年多命招安故盜力強則肆暴力屈則就招苟不略加勦除蠱起之衆未可遽殄許之飛入賀州境得成譟者縛之帳下飛出帳調兵食吏曰糧盡矣奈何飛陽曰姑反茶陵已而顧譟若失意狀頓足而入



陰令逸之譟歸告成成大喜期翌日來追飛命士蓐食潛趨遶嶺未明已至太平場破其砦成據險拒飛飛麾兵掩擊賊大潰成走據北藏嶺上梧關遣將迎戰飛不陣而鼓士爭奮奪二隘據之成又自桂嶺置砦至北藏嶺連控隘道親以衆十餘萬守蓬頭嶺飛部才八千一鼓登嶺破其衆成奔連州飛謂張憲等曰成黨散追去而殺之則脅從者可憫縱之則復聚爲盜今遣若等誅其酋而撫其衆慎勿妄殺累主上保民之仁於是憲自賀連徐慶自邵道王貴自郴桂招降者二萬與飛會連州進兵追成成走宣撫司降時以盛夏行師瘴地撫循有方士無一人死癘者嶺表平 按解元傳劉忠據白面山憑險築壘世忠討之距賊營三十里而陣元獨跨馬涉水薄賊砦四顧周覽賊因山設望樓從高瞰下以兵守之屯壯銳於四山視其指呼而出戰元既得其形勢歸告世忠曰易與爾若奪據其望樓則技窮矣世忠然之遣元率兵五百長戟居中翼以弓矢自下趨高賊衆莫支乃據望樓立赤幟四面並進賊遂平

紹興三年三月吳玠等擊敗金人於金牛鎮 按宋史高宗本紀紹興三年春正月乙丑金人陷金州鎮撫使王彥焚積聚退保西鄉二月辛卯吳玠遇金人於饒風關王彥自西鄉來會金人分兵攻



關統制郭仲敗走丁酉饒風關破玠趨西縣彥奔達州四川大震己亥金帥撒離曷入興元府經略使劉子羽焚其城走三泉縣吳玠退屯仙人關是月金兵深入至金牛鎮疑有伏由褒斜谷引兵還興元吳玠劉子羽追擊其後殺獲甚衆五月論金牛之功以吳玠爲利州路階成鳳州制置使劉子羽爲寶文閣直學士王彥爲保大軍承宣使將帥第賞有差按劉子羽傳建炎三年春正月王彥失守金州退保石泉子羽亟移兵守饒風嶺馳告吳玠玠大驚卽越境而東日夜馳三百里至饒風列營拒守金人悉力仰攻死傷山積更募死士由間道自祖溪入關繞出玠後玠遽邀子羽去子羽不可而留玠同守定軍山玠難之遂西子羽焚興元退守三泉縣從兵不滿三百與士卒取草牙木甲食之遺玠書訣別玠時在仙人關其愛將楊政大呼軍門曰節使不可負劉待制不然政輩亦舍節使去矣玠乃問道會子羽子羽留玠共守三泉玠曰關外蜀之門戶不可輕棄復往守仙人關子羽以潭毒山形斗拔其上寬平有水乃築壁壘十六日而成金人已至距營十數里子羽據胡牀坐於壘口諸將泣告曰此非待制坐處子羽曰子羽今日死於此敵尋亦引去自金人入梁洋西蜀復大震休復欲移潼川子羽遺復書言已在此金人必不南渡乃止撒離曷由斜谷北去子羽謀邀之

於武休不及既回鳳翔遣十人持書旗招子羽子羽盡斬之而留其一縱之還曰爲我語賊欲來卽來吾有死爾何可招也先是子羽預徙梁洋公私之積至是金人深入饋不繼又腹背爲子羽玠所攻死傷十五六疫癘且作亟遁去子羽出師掩擊墮溪澗死者不可勝計餘兵不能自拔者悉降始金人攻蜀所選士卒千取百百取十戰被重鎧登山攻險每一人前輒二人推其後前者死後者被其甲以進又死則又代之其爲必取計如此淩雖剗師卒全蜀子羽之力居多子羽還興元四年坐富平之役與淩俱罷尋爲言者所論責授單州團練副使泉州安置 按吳玠傳金人窺蜀以璘駐兵和尚原扼其衝不得逞將出奇取之時玠在河池金人用叛將李彥琪駐秦州睨仙人關以綴玠復令遊騎出熙河以綴關師古撒離喝自商於直擣上洋三年正月取金州二月長驅趨津漢興元守臣劉子羽急命田晟守饒風關以驛書招玠入援玠自河池日夜馳三百里以黃柑遺敵曰大軍遠來聊用止渴撒離喝大驚以杖擊地曰爾來何速耶遂大戰饒風嶺金人被重鎧登山仰攻一人先登則二人擁後先者旣死後者代攻玠軍弓弩亂發大石摧壓如是者六晝夜死者山積而敵不退募敢死士人千銀得士五千將來攻會玠小校有得罪奔金者導以祖溪間路出關背乘高以闚

饒風諸軍不支遂潰玠退保西縣敵入興元劉子羽退保三泉築潭毒山以自固玠走三泉會之未幾金人北歸玠急遣兵邀於武休關掩擊其後軍墮澗死者以千計盡棄輜重去金人始謀本謂玠在西邊故道險東來不虞玠馳至雖入三郡而失不償得進玠檢校少保充利州路階成鳳州制置使

紹興四年三月吳玠等敗金人於仙人關九月金齊合兵來侵韓世忠敗之於大儀鎮十二月金齊逼廬州岳飛遣將擊敗之按宋史高宗本紀紹興四年二月辛丑金人犯仙人關三月辛亥朔吳玠率楊政吳璘田晟王喜諸將與兀朮戰於仙人關大敗之兀朮遁去秋七月丙辰賞仙人關之功以吳玠爲檢校少師奉寧保靜軍節度使吳璘楊政以下論賞有差九月庚午金齊合兵自淮陽分道來犯壬申渡淮楚州守臣樊叙棄城去韓世忠自承州退保鎮江府冬十月丙子朔與趙鼎定策親征命張俊以軍援淮東劉光世移軍建康車駕擇日進發己卯韓世忠自鎮江率兵復如楊州金人犯滁州以張浚爲浙西江東宣撫使金人圍亳州壬午僞齊兵犯安豐縣丙戌命胡松年詣江上會諸將議進兵戊子韓世忠邀擊金人於大儀鎮敗之又遣將董旼敗之於天長縣鴉口橋己丑金

人攻承州韓世忠遣將成閔解元合兵擊於北門敗之金人圍濠州甲午遣侍御史魏玘監察御史田如璫詣劉光世張浚軍中計事光世始移軍太平州丙申金人陷濠州守臣寇宏棄城走戊戌帝御舟發臨安劉錫楊沂中以禁兵扈從己亥韓世忠捷奏至庚子張浚率兵發鎮江如建康壬寅帝次平江命韓世忠楊沂中分兵控扼沿海要地乙巳仇愈遣將孫暉擊金人於壽春敗之復霍丘安豐二縣十一月庚戌賞承州水砦首領徐康等要擊金兵之功轉官有差壬子始下詔聲劉豫逆罪諭親征之旨以厲六師吳玠遣統制楊從儀等率兵敗金人於臘家城癸丑金人入光州甲寅僞齊知光州許納破石額山砦遂據之乙卯韓世忠遣兵夜擊金人營於承州破之金人犯六合縣丙辰掠全椒縣三城湖丁巳命董敦趙康直總領淮東水砦戊午金人陷滁州劉光世移軍建康韓世忠移軍鎮江張浚移軍常州庚申宴犒守江將士癸亥劉光世遣統制王德擊金人於滁州之桑根敗之甲子命滁和諸州移治保聚乙丑金人犯滁州己巳劉光世遣統制王師晟等率兵夜入南壽春府襲金人敗之執僞齊知府王靖詔張浚視師江上十二月戊寅命都督府右軍統制李貴部兵屯扼福山鎮辛巳命中軍統制王進屯兵泰州防拓通泰丙戌吳倫遣兵攻臘家城破之壬辰金齊兵

逼廬州仇愈嬰城固守岳飛所遣統制徐慶牛皐援兵適至敗走之劉光世亦遣統制靳賽戰於慎縣張浚遣統制張宗顏擊敗金人於六合庚子金人退師癸卯金人去滁州按吳玠傳紹興四年二月敵復大入攻仙人關先是吳璘在和尙原餉餽不繼玠又謂其地去蜀遠命璘棄之經營仙人關右殺金平剗築一壘移原兵守之至是兀朮撒離喝及劉夔率十萬騎入侵自鐵山鑿崖開道循嶺東下玠以萬人當其衝璘率輕兵由七方關倍道而至與金兵轉戰七晝夜始得與玠合敵首攻玠營玠擊走之又以雲梯攻壘壁楊政以撞竿碎其梯以長矛刺之璘拔刀畫地謂諸將曰死則死此退者斬金分軍爲二元朮陣於東韓常陣於西璘率銳卒介其間左縈右繞隨機而發戰久璘軍少憊急屯第二隘金生兵踵至人被重鎧鐵鉤相連魚貫而上璘以駐隊矢迭射矢下如雨死者層積敵踐而登撒離喝駐馬四視曰吾得之矣翌日命攻西北樓姚仲登樓酣戰樓傾以帛爲繩挽之復正金人用火攻樓以酒缶撲滅之玠急遣統領田晟以長刀大斧左右擊明炬四山震鼓動地明日大出兵統領王喜王武率銳士分紫白旗入金營金陣亂奮擊射韓常中左目金人始宵遁玠遣統制官張彥刼橫山砦王俊伏河池扼歸路又敗之以郭震戰不力斬之是役也金自元帥以下皆

攜挈來劉襲乃豫之心腹本謂蜀可圖既不得逞度玠終不可犯則還據鳳翔授甲士田爲久留計自是不妄動捷聞授玠川陝宣撫副使四月復鳳秦隴三州七月錄仙人關功拜檢校少師奉寧保定軍節度使璘自防禦使升定國軍承宣使楊政以下遷秩有差按吳璘傳璘在和尙原玠命棄原別營仙人關以防金人深入四年元朮撒離喝果以大兵十萬至關下璘自武階路入援先以書抵玠謂殺金平地闊遠前陣散漫須後陣阻隘然後可以必勝玠從之急修第二隘璘冒圍轉戰會於仙人關敵果極力攻第二隘諸將有請別擇形勝以守者璘奮曰兵方交而退是不戰而走也吾度此敵去不久矣諸君第忍之震鼓易幟血戰連日金兵大敗二酋自是不敢窺蜀者數年露布獻捷遷定國軍承宣使熙河蘭廓路經略安撫使知熙州按楊政傳三年金攻饒風關政從玠戰關下凡六日改明州觀察使四年撒離喝裒精兵十萬欲道仙人關入蜀至上畬田玠築壘於關外政曰此地爲蜀阨塞當堅守時出奇擊之玠用其言金人變態多端政隨機應之連日百餘戰敵帥督戰益急政命卒以神臂弓射之又選甲士千餘出山谷斷其兵使不得進退又出敵不意夜斫其營敵遂遁去追至河池而還授龍神衛四廂都指揮使環慶路經略安撫使按韓世忠傳四年以建



康鎮江江東宣撫使駐鎮江是歲金人與劉豫合兵分道入侵帝手札命世忠飭守備圖進取辭有懇切世忠受詔感泣曰主憂如此臣子何以生爲遂自鎮江濟師俾統制解元守高郵候金步卒親提騎兵駐大儀當敵騎伐木爲柵自斷歸路會遣魏良臣使金世忠撤炊爨給良臣有詔移屯守江良臣疾馳去世世忠度良臣已出境卽上馬令軍中曰朕吾鞭所嚮於是引軍次大儀勒五陣設伏二十餘所約聞鼓卽起擊良臣至金軍中金人問王師動息具以所見對語兒孥輩聞世忠退喜甚引兵至江口距大儀五里別將撻孛也擁鐵騎過五陣東世忠傳小麾鳴鼓伏兵四起旗色與金人旗雜出金軍亂我軍迭進背鬼軍各持長斧上搥人胸下斫馬足敵被甲陷泥淖世忠麾勁騎四面蹂躪人馬俱斃遂擒撻孛也等二百餘人所遣董旼亦擊金人亦天長縣踰口擒女真四十餘人解元至高郵遇敵設水軍夾河陣日合戰十三相拒未決世忠遣成閔將騎士往援復大戰俘生女真及千戶等世忠復親追至淮金人驚潰相蹈藉溺死甚衆撻孛聞羣臣入賀帝曰世忠忠勇朕知其必能成功沈與求曰自建炎以來將士未嘗與金人迎敵一戰今世忠連捷以挫其鋒厥功不細帝曰第優賞之於是部將董旼陳桷解元呼延通等皆峻擢有差論者以此舉爲中興武功第一時撻孛屯



泗州兀朮屯竹塹鎮爲世忠所扼以書幣約戰世忠許之且使兩伶人以橘茗報聘會雨雪金餽道不通野無所掠殺馬而食蕃漢軍皆怨兀朮夜引軍還劉麟劉貌棄輜重遁按張浚傳四年浚既去國慮金人釋川陝之兵必將併力窺東南而朝廷已議講解乃上疏極言其狀未幾劉豫之子麟果引金人入攻高宗思浚前言策免朱勝非而參知政事趙鼎請幸平江乃召浚以資政殿學士提舉萬壽觀兼侍讀入見高宗手詔辨浚前誣除知樞密院事浚既受命卽日赴江上視師時兀朮擁兵十萬於揚州約日渡江決戰浚長驅臨江召韓世忠張俊劉光世議事將士見浚勇氣十倍浚既部分諸將身留鎮江節度之世忠遣麾下王愈詣兀朮約戰且言張樞密已在鎮江兀朮曰張樞密貶嶺南何得乃在此愈出浚所下文書示之兀朮色變夕遁按張俊傳四年十月金人與劉豫分道入侵先是諜至舉朝震恐或請他幸俊謂趙鼎曰將何避之惟向前進一步庶可脫當聚天下兵守平江徐爲計鼎曰公言避非策是也以天下兵守一州非也公但堅前議足矣遂以俊爲兩浙西路江東南路宣撫使屯建康旣而改淮西宣撫使瀕江相距逾月敵不得入俊遣張宗顏潛渡至六合出其背敵將引去俊繼遣王進曰敵旣無留心必逕渡淮去可速及其未濟擊之進往敵果北渡

遂薄諸淮大敗之獲其酋程師回張延壽以獻按岳飛傳僞齊遣李成挾金人入侵破襄陽唐鄧隨郢諸州及信陽軍湖寇楊么亦與僞齊通欲順流而下李成又欲自江西陸行趨兩浙與么會帝命飛爲之備四年除兼荆南鄂岳州制置使飛奏襄陽等六郡爲恢復中原基本今當先取六郡以除心膂之病李成遠遁然後加兵湖湘以殄羣盜帝以諭趙鼎鼎曰知上流利害無如飛者遂授黃復州漢陽軍德安府制置使飛渡江中流顧幕屬曰飛不擒賊不涉此江抵郢州城下僞將京超號萬人敵乘城拒飛飛鼓衆而登超投崖死復郢州遣張憲徐慶復隨州飛趣襄陽李成迎戰左臨襄江飛笑曰步兵利險阻騎兵利平曠成左列騎江岸右列步平地雖衆十萬何能爲舉鞭指王貴曰爾以長鎗步卒擊其騎兵指牛皐曰爾以騎兵擊其步卒合戰馬應槍而斃後騎皆擁入江步卒死者無數成夜遁復襄陽劉豫益成兵屯新野飛與王萬夾擊之連破其衆飛奏金賊所愛惟子女金帛志已驕惰劉豫僞僞人心終不忘宋如以精兵二十萬直擣中原恢復故疆誠易爲力襄陽隨郢地皆膏腴苟行營田其利爲厚臣候糧足卽過江北勦戮敵兵時方重深入之舉而營田之議自是興矣進兵鄧州成與金將劉合孛葦列砦拒飛遣王貴張憲掩擊賊衆大潰劉合孛葦僅以身免賊